



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo

**GRADSKO VIJEĆE**

Broj: 01-GV-02-1472/22  
Sarajevo, 05.10.2022. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na 19. sjednici održanoj dana 05.10.2022. godine, primilo je k znanju

Informaciju o implementaciji Plana djelovanja za mlade.

*PREDSJEDAVAJUĆI GRADSKOG VIJEĆA*

*Jasmin Ademović, s.r.*

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** gsgv@sarajevo.ba  
**Web:** gradskovijece.sarajevo.ba





**Grad Sarajevo**  
**City of Sarajevo**

**Bosna i Hercegovina**  
**Federacija Bosne i Hercegovine**  
**Kanton Sarajevo**  
**Grad Sarajevo**  
**GRADONAČELNICA**

*INFORMACIJA*  
*O IMPLEMENTACIJI PLANA DJELOVANJA ZA MLADE*

*Sarajevo, septembar 2022. godine*

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 407 443  
**Fax:** +387 33 208 341  
**Email:** grad@sarajevo.ba  
**Web:** www.sarajevo.ba



## UVOD

Programom rada Gradskog vijeća Grada Sarajeva za 2022. godinu planirana je realizacija teme *Informacija o implementaciji Plana djelovanja za mlade* kvartalno, odnosno u mjesecima martu, junu, septembru i decembru. U skladu sa navedenim Programom, pripremljena je Informacija o implementaciji Plana djelovanja za mlade za treći kvartal 2022. godine, a koja predstavlja aktivnosti poduzete u protekla tri mjeseca u skladu sa Planom djelovanja za mlade Grada Sarajeva.

Zakon o mladima Federacije Bosne i Hercegovine pod pojmom mladi podrazumijeva osobe u životnoj dobi od navršenih 15 do navršenih 30 godina starosti. Važno je istaći da su mladi, iako zasebna društvena kategorija koja ima svoje potrebe i probleme, integralni dio društva i jako važna podrška razvoju svih zajednica pa tako i grada Sarajeva.

Član 8. Zakona o mladima Federacije Bosne i Hercegovine navodi da odgovorni organi vlasti trebaju mladim osobama putem utvrđenih mjera dati na raspolaganje različite mogućnosti u cilju unaprijeđivanja njihovog razvoja. Pod odgovornim organima vlasti Zakon podrazumijeva općinski, gradski i kantonalni nivo vlasti u Federaciji Bosne i Hercegovine.

Navedeni zakon obavezuje ove nivoe vlasti da odgovorno poduzimaju utvrđene mjere kako bi unaprijedili razvoj mladih ljudi. Pod utvrđenim mjerama podrazumijevaju se mjere predviđene usvojenim dokumentima, kao što su strategija prema mladima i program djelovanja za mlade koji je donijela svaka institucija zasebno na temelju strategije prema mladima.

U skladu s članom 14. Zakona o mladima Federacije Bosne i Hercegovine, općinski, gradski i kantonalni organi vlasti dužni su samostalno osigurati minimum mjera na planu rada s mladima i omladinskih aktivnosti, kao i mehanizme i kapacitete koji, između ostalog, uključuju uspostavljanje stručnog radnog tijela za izradu, ažuriranje i praćenje provedbe lokalnih i kantonalnih strategija prema mladima, a u čijem će radu učestvovati predstavnici vijeća mladih ili omladinskih udruženja.

Općinske, gradske i kantonalne vlasti zakonski su obavezne koordinisati aktivnosti u vezi s radom s mladima i omladinskim aktivnostima. Pod tom koordinacijom podrazumijeva se koordinisanje aktivnosti iz federalne, kantonalne, općinske ili gradske strategije prema mladima, odnosno programa djelovanja za mlade, te povezivanje sličnih projekata i aktivnosti, praćenje uspješnosti u provođenju i postizanju rezultata, vođenje evidencije omladinskih aktivnosti i dr.

Član 8. Zakona o mladima Federacije Bosne i Hercegovine navodi da rad s mladima nude omladinska udruženja, ostala udruženja, neformalne grupe i drugi nosioci rada s mladima iz nevladinog sektora, kao i nosioci rada s mladima iz vladinog sektora. Iz toga zaključujemo da odgovornost za rad s mladima snosi i vladin i nevladin sektor.

Kada je u pitanju nevladin sektor, pod istim podrazumijevamo omladinska i druga udruženja, neformalne grupe i druge nosioce rada s mladima, poput domaćih i stranih fizičkih i pravnih lica koja se bave pitanjima mladih ili su subjekti od značaja za promociju i zaštitu uloge i pozicije mladih, a imaju prava i obaveze u skladu s ovim zakonom.

Uzimajući u obzir gore navedeno, a u skladu sa Zakonom o mladima FBiH, Gradska služba za obrazovanje je inicirala izradu Plana djelovanja za mlade Grada Sarajeva.

Plan djelovanja za mlade Grada Sarajeva je prvi strateški dokument koji objedinjuje i razrađuje ciljeve i mjere kojima Grad Sarajevo želi odgovoriti na razne potrebe i probleme mladih i općenito poboljšati kvalitetu života mladih te strateški podržati Gradsku upravu u radu sa mladima.

Proces izrade dokumenta koordinisala je Gradska služba za obrazovanje, sport, kulturu i mlade uz tehničku i stručnu pomoć Instituta za razvoj mladih Kult s kojim je navedena služba saradivala i na prvom istraživanju i analizi o problemima i potrebama mladih grada Sarajeva.

Plan djelovanja za mlade Grada Sarajeva 2020.-2024. usvojen je od strane Gradskog vijeća Grada Sarajeva, na sjednici održanoj dana 04.10.2019. godine, te isti obuhvata sedam oblasti od posebnog značaja za mlade, a to su:

- obrazovanje i nauka mladih;
- rad, zapošljavanje i preduzetništvo mladih;
- socijalna briga mladih;
- zdravstvena zaštita mladih;
- kultura i sport;
- aktivizam (učesće, volontiranje i mobilnost) mladih;
- sigurnost mladih.

## IMPLEMENTACIJA PLANA DJELOVANJA ZA MLADE GRADA SARAJEVA

Kada je riječ o aktivnostima koje su u proteklom periodu provedene implementirajući Plan djelovanja za mlade, Grad Sarajevo je posredstvom Gradske službe za obrazovanje, sport, kulturu i mlade, a u skladu sa mogućnostima, podržao nekoliko projekata gdje su mladi bili ciljna skupina te pružio podršku ovoj populaciji u različitim oblastima.

### OBLAST KULTURE

<b>Cilj: Mladi na području grada Sarajeva aktivno koriste kulturne sadržaje i učestvuju u njihovom kreiranju</b>
------------------------------------------------------------------------------------------------------------------

<b>Mjere:</b>
---------------

- |                                                                                                                                                                                                                                                                |
|----------------------------------------------------------------------------------------------------------------------------------------------------------------------------------------------------------------------------------------------------------------|
| <ul style="list-style-type: none"><li>- Poticanje obrazovanja publike, razvoja kreativnosti i kulturnog stvaralaštva mladih kroz saradnju aktera u društvu</li><li>- Promocija učesća mladih na kulturnim manifestacijama na području Grada Sarajeva</li></ul> |
|----------------------------------------------------------------------------------------------------------------------------------------------------------------------------------------------------------------------------------------------------------------|

Pružena je podrška Udruženju „Pop Rock Škola Sarajevo“ pri realizaciji projekta **Omladinski muzički festival „Bendovi zovu 033“**. Festival je održan u periodu od 01. do 04. jula 2022. godine u Sarajevu. Cilj je bio potaći učesće djece i mladih u kreiranju muzičke scene Bosne i Hercegovine. Koncipiran je tako da su ove ciljne skupine u nekoliko faza dobile adekvatnu podršku kako bi svojim djelovanjem utjecali na oživljavanje pop-rock kulture koja zadnju deceniju uglavnom stagnira. Predstavljeno je 300 mladih muzičara, plesača i slikara iz 11 gradova Bosne i Hercegovine. Grad Sarajevo je podržao ovaj projekat iznosom od 3.000,00 KM.

Grad Sarajevo bio je pokrovitelj **14. Omladinskog Film Festivala** u organizaciji Udruženja mladih umjetnika. Festival je održan u periodu od 19. do 23. jula 2022. godine na lokacijama poput Cineplexx-a Sarajevo, Vilsonovog šetališta, igrališta OŠ „Safvet-beg Bašagić“, Bosanskog kulturnog centra Kantona Sarajevo i dr. Omladinski Film Festival već godinama okuplja blizu 5.000 učesnika i veliki broj posjetilaca iz Bosne i Hercegovine, regije i svijeta. Festival predstavlja jedinstvenu platformu za promociju mladih filmskih autora. Njegov fokus je i na promociji kratkog studentskog

filma, te otvorenih kina gdje Udruženje ima za cilj edukovati publiku na koji način gledati film i kako ga kritički doživjeti. Grad Sarajevo je podržao ovaj projekat iznosom od 2.000,00 KM.

Asocijacija studenata Fakulteta političkih nauka Univerziteta u Sarajevu, u saradnji sa studentskim asocijacijama Filozofskog fakulteta i Fakulteta islamskih nauka Univerziteta u Sarajevu, obratila se molbom za finansijsku podršku pri organizaciji **projekta obilježavanja godišnjice genocida u Srebrenici pod nazivom „Srebrenica, nismo doživjeli, ali osjetimo“**. Početak programa predstavljala je interpretacija himne Bosne i Hercegovine od strane članove orkestra Muzičke akademije Univerziteta u Sarajevu, potom je upriličena projekcija kratkog filma napravljenog od strane studenata Odsjeka za anglistiku sa Filozofskog fakulteta. Studenti Akademije scenskih umjetnosti Sarajevo priredili su performans, te je upriličena izvedba Srebreničkog inferna od strane horova Fakulteta islamskih nauka i Muzičke akademije. Projekat je dobio podršku Grada Sarajeva u iznosu od 1.000,00 KM.

Grad Sarajevo je podržao i **učešće grupe Teens s predstavom „Strah“ na Internacionalnom teatarskom festivalu u Friedrichshafenu** u organizaciji JU Međunarodni centar za djecu i omladinu Novo Sarajevo i Škole glume „Mala scena“. Predstava „Strah“ bila je uvrštena u program 37. izdanja navedenog festivala, a koji je bio održan u periodu od 19. do 25. juna. Važno je istaći da ove godine Grad Sarajevo i Friedrichshafen obilježavaju 50 godina pobratimskih odnosa, a što je dalo značajnu dimenziju ovom učešću. U predstavi glumi 14 djevojčica i dječaka, a ista je adaptacija školske lektire i romana „Veliki talas“ spisateljice Pearl Black. Projekat je dobio podršku Grada Sarajeva u iznosu od 1.000,00 KM.

## OBLAST SPORTA

<b>Cilj: Mladi na području grada Sarajeva aktivno se bave sportom i imaju zdrave životne navike</b>
-----------------------------------------------------------------------------------------------------

Mjere:
--------

- Promocija sportskih sadržaja i programa na području grada Sarajeva
----------------------------------------------------------------------

Grad Sarajevo kontinuirano nastoji pružiti značajniju podršku mladim sportistima, a koji pored promocije našeg grada i države, rade i na aktivnoj promociji bavljenja sportom, kao i zdravih životnih navika svojim vršnjacima, te ostvaruju zapažene rezultate.

U proteklom periodu Grad Sarajevo novčano je nagradio **Lanu Pudar** iznosom od 20.000,00 KM za ostvarene vrhunske sportske rezultate na Evropskom prvenstvu u vodenim sportovima koje se održalo u Rimu. Naime, Lana je na ovom međunarodnom takmičenju osvojila zlatnu medalju u disciplini 200 metara delfin postavši evropskom prvakinjom u seniorskoj konkurenciji.

**Veliko finale Sportskih igara mladih** održano je u Sarajevu od 05. do 07. jula 2022. godine, a učestvovalo je više od 900 pobjednika regionalnih/polufinalnih takmičenja iz više od 60 gradova/općina iz cijele Bosne i Hercegovine. Nakon njega pravo na učešće na Međunarodnom finalu u Splitu ostvarilo je 218 pobjednika, odnosno predstavnika naše države. Sportske igre mladih su najveća amaterska sportska manifestacija u Evropi koja pruža djeci i mladima da se, popuno besplatno, takmiče u 10 sportova. Važno je istaći i kako se radi o jednoj od sportskih manifestacija

od posebnog interesa za Grad Sarajevo te je njena organizacija sufinansirana iznosom od 9.000,00 KM.

U proteklom periodu po osnovu javnog poziva pružena je podrška različitim sportskim organizacijama, a koje su nerijetko za ciljnu skupinu imale mlade. Jedna od njih je i Ženski nogometni klub Vogošća s projektom **Besplatne škole fudbala za djevojčice i djevojke**. Projekat je dobio podršku Grada Sarajeva u iznosu od 8.000,00 KM.

Još jedan od projekata koji je dobio podršku po ovom osnovu bio je i projekat Udruženja Judo kluba Olimp, a za kojeg je ranije osigurana i djelimična podrška kantonalnog nivoa vlasti. Radi se o projektu „**Mladi za mlade – nepretilost, biram zdravlje i sport**”, a ciljna skupina su srednjoškolci odnosno učenici 1. razreda Srednje ekonomske škole Sarajevo, kao i 9. razreda osnovnih škola. Projekat je dobio podršku Grada Sarajeva u iznosu od 2.500,00 KM.

## OBLAST AKTIVIZMA (UČEŠĆE, VOLONTIRANJE I MOBILNOST) MLADIH

<b>Cilj: Mladi na području grada Sarajeva kvalitetno provode slobodno vrijeme koristeći resurse kojima Grad Sarajevo raspolaže</b>
------------------------------------------------------------------------------------------------------------------------------------

<b>Mjere:</b>
---------------

- |                                                                                                                                                               |
|---------------------------------------------------------------------------------------------------------------------------------------------------------------|
| <ul style="list-style-type: none"><li>- Podrška i preporuka projektima i kompanijama koje omogućavaju volontiranje mladih s područja grada Sarajeva</li></ul> |
|---------------------------------------------------------------------------------------------------------------------------------------------------------------|

Grad Sarajevo već dugi niz godina podržava Sarajevo Film Festival, kulturnu manifestaciju od posebnog interesa za Grad Sarajevo, a koja mladima daje priliku za stjecanje volonterskog iskustva, kao i jedinstven doživljaj festivala osjećajući se dijelom tima dok daju vlastiti doprinos uspješnoj realizaciji ovog projekta.

**Volontiranje na Sarajevo Film Festivalu** prilika je koja, uz pristup određenom broju projekcija, omogućava i stjecanje praktičnog iskustva organizacije događaja u profesionalnom i prijateljskom okruženju. Konkurs za prijavu za volontiranje na ovogodišnjem izdanju Festivala bio je otvoren do 17. juna 2022. godine, a isti je objavljen i na oficijelnoj web stranici Grada Sarajeva.

Poziv za volontiranje bio je otvoren za sve od 15 godina i više. Poslovi tehničke pripreme Festivala, pomoć prilikom dočeka, registracije i smještaja gostiju, rad u Festivalskom i Press centru, bile su neke od brojnih mogućnosti koje se nude volonterima. Volontiranje je idealna prilika da mladi postanu dio ovog velikog i uspješnog događaja, a osim pristupa određenom broju projekcija, volonterima se pruža mogućnost timskog rada, usvajanja i razvijanja vještina i znanja, stjecanje praktičnog iskustva u organizaciji i realizaciji velikog kulturnog događaja.

Volonteri nakon završetka Festivala dobivaju potvrdu o volontiranju na Sarajevo Film Festivalu, a koja im može koristiti kao dodatno priznanje pri budućem školovanju ili radu.

Zajednički rad volontera iz nekoliko zemalja doprinosi posebnoj atmosferi i uspješnosti Sarajevo Film Festivala.

Kada je riječ o volontiranju, i Grad Sarajevo, u skladu s mogućnostima, pruža priliku mladima za stručno osposobljavanje nakon završetka školovanja, te za naknade jednog volontera izdvaja u prosjeku više od 7.200,00 KM bruto na godišnjem nivou. U skladu s propisima, Grad Sarajevo može imati do 10 volontera.

## ZAKLJUČAK

Pri implementaciji Plana djelovanja za mlade u protekla tri mjeseca je iz Budžeta Grada Sarajeva za 2022. godinu izdvojeno **više od 46.500,00 KM** koristeći se različitim budžetskim stavkama, uzimajući u obzir propise Odluke o izvršavanju Budžeta Grada Sarajeva za 2022. godinu („Službene novine Kantona Sarajevo”, broj 02/22), ali i ograničena sredstva na budžetskoj stavci koja je predviđena za njegovu implementaciju.

Veliki broj projekata za mlade podržan je postupajući u skladu Odlukom o uslovima i postupku prihvatanja pokroviteljstva Grada Sarajeva („Službene novine Kantona Sarajevo“, broj 5/06) i Pravilnikom o kriterijima za prihvatanje pokroviteljstva Grada Sarajeva („Službene novine Kantona Sarajevo“, broj 32/17), a za čiju primjenu je u Budžetu Grada Sarajeva za 2022. godinu previđen tri puta veći iznos sredstava.